



**REPÚBLICA DEMOCRÁTICA DE TIMOR-LESTE**

**DISCURSO DE  
SUA EXCELÊNCIA PRIMEIRO-MINISTRO  
KAY RALA XANANA GUSMÃO  
IHA OCASIÃO SESSÃO ABERTURA REUNIÃO  
TIMOR-LESTE HO PARCEIROS  
DESENVOLVIMENTO**

**Díli**

**12 de Julho de 2011**

Excelências

Senhoras no Senhores,

Uluk nanaín, ha'u hakarak saúda ita-boot sira hotu nebé mai husi rai dook atu, dala ida tan, participa iha reunião importante ida né, nebé harak liu-liu mak reforça parcerias estratégicas ba ita nia nação ninia desenvolvimento

Ita hotu hatene katak timoroan sira hotu no Timor-Leste rasik nia futuro, associa ka liga metin ho sinergias, nebé to'o agora ita cria liuhusi encontros e, portanto, lori ha'u-nia naran rasik, no mos Governo ho povo Timor-Leste tomak nia naran, ha'u apresenta boas-vindas no agradece ita-boot sira hotu nia presença.

Senhoras no Senhores,

La'ós novidade katak desde 1999, lora nebé hala'o, iha Tóquio, primeira reunião doadores nian, mak ita hetan privilégio boot ho Ajuda Internacional. E ninia objectivo mak atu harii Estado de Direito Democrático ida no oinsá buka hakmán ita nia povo nia moris nebé kiak-rabat-rai.

Nuné, maski ho susar barabarak, ita la'o ona dalan nebé naruk tebes husi 1999.

Ohin, ita laran kmanek tebetebes tanba bele kuda no haburas ona cultura governação democrática nian ida, hodi hatuur hanesan prioridade ba dahuluk, mak oinsá bele hametin it nia instituições Estado ho promove sistema político ida ke justo no participativo.

Hatene momoos katak la'ós fácil atu democracia bele manán iha Rai ida nebé ema barak liu mak sei moris kiak no psicologicamente sei sente todan no laran ta'uk, maibé ita nia jovens, feto no mane sira hotu nia perseverança, katak laran fiar no metin nafatin, mak halo be ita bele hakotu tebes dunik malisan violência no crises cíclicas, nebé durante né kona hela de'it ita nia rain Timor-Leste.

Hetan inspiração husi térus no susar nebé ita hasoru, no mos kaer ba experiência husi Rai sira seluk nebé iha situação frágil, nebé , em média, lori besik tinan 10 to'o 15 atu hetan fali estabilidade, mak ita hakarak aposta iha investimento nebé boot ho iniciativas nebé iha impacto directo ba população tomak nia moris, hodi nuné bele hetan participação no

confiança nebé boot husi Povo tomak, iha resolução conflitos ho hametin Unidade no Estabilidade Nacional.

Tanba precisa altera ka muda ema nia hanoin no hakarak mak, iha 2009, iha 10º. Aniversário referendo nian ita haklaken mote ida ba ita nia Nação hanesan : **“Adeus Conflito, Bem-vindo Desenvolvimento”**. Iha 31 Dezembro 2010, povo tomak bele celebra ho laran haksolok no kamán, ambiente segurança, estabilidade no confiança foun ida ba futuro. Ita finalmente bele hakotu ciclo conflitos no violências nebé mosu tinan rua-rua laran.

Buat nebé halo ita hakat fali ba kotuk no crises todan boot, nebé ita hasoru iha tinan hira né laran, ita consegue muda, halo sai fali hanesan lições importantes ba futuro, hodi hatene loloos ona, oinsá mak ita bele lida ka hasoru fragilidade ita nia Estado né nian.

Ho dunik ita-boot sira nia tulun, durante tempo né tomak, nebé ita serviço hamutuk, hodi hatuur iha linha ida de’it, tinatinan, prioridades nacionais, mak ita bele haree katak iha ona progresso boot.

E, hanesan resultado, Timor-Leste bele sai país ida ke seguro menos de tinan sanulu laran, goza paz, estabilidade no economia ida nebé ho crescimento di’ak.

Excelências

Senhoras no senhores,

Tanba buat hirak né hotu, mak ohin ita assinala tan marco histórico ida lori la’o ba futuro, no lança iha Reunião Timor-Leste ho ninia Parceiros sira, **Plano Estratégico de Desenvolvimento**, nebé foin hetan aprovação horischik husi Parlamento Nacional.

No ba maluk sira nebé sei hanoin kona-ba Sinopse, nebé apresenta iha né tinan uluk, Plano Estratégico de Desenvolvimento fó visão clara ida ba tinan ruanulu oin mai no hahú fase foun desenvolvimento nacional nian nebé arrojado ka barani liu.

#### *Enquadramento Plano Estratégico Desenvolvimento nian*

Ha’u husu licença atu ba dala uluk liu halo lai **enquadramento kona-ba Plano** né, nebé consegue mobiliza conhecimentos, meios no esforços tomak nebé ih, lori identifica no hatene didi’ak Povo timor nia hakarak no dalan nebé nia hili ba país ida né.

Iha Maio de 2002, lança tiha ona, husi I Governo RDTL, Plano Desenvolvimento Nacional nian, hanesan resposta ba aspirações Povo Timor-Leste nian ho ninia expectativas kona-ba desenvolvimento ba tinan 20 anos.

Iha documento ida né, povo timor imprime tiha ona, iha Visão nebé simples maibé haree husi aspectos oioin, sasadik kona-ba construção Nação ho necessidades desenvolvimento País nian.

Plano Desenvolvimento Nacional, tinan 2002 nian, bele, entretanto, no ba período, tinan lima laran, execução Plano né nian, ho acções nebé orienta liu ba criação instituições nebé seidauk iha no ba recrutamento funcionalismo público, hanesan iha componente jurídico-legal ho estruturas físicas, além de define mos estratégias, identifica objetivos no adopta princípios orientadores acção, ho ninia indicadores avaliação rasik.

Tuir contexto ida né mak mosu pergunta husi líderes políticos barak, mesmo husi agências internacionais balu: ‘Se iha ona Plano de Desenvolvimento Nacional, tansá mak tenke halo tan seluk?’

Nuné, no kona-ba impertinência relaciona ho necessidade ba Plano foun ida, ita bele lee iha PDN, tinan 2002 hanesan né: *‘Né mak primeiro Plano Timor-Leste nian, tanba né mak importante katak tenke halo revisão, dala barak, lori heree didi’ak se direcções estratégicas hotu-hotu sei continua vale nafatin ka tenke halo tan fali alterações.’*

Recomenda mos katak *‘tanba né trata kona-ba primeiro Plano Timor-Leste nian, mak depois de tinan ida halo tiba nia operacionalização, devia halo revisão completa’*. Revisão nunca halo maski ho advertência ka aviso katak, halo plano ba futuro, né buat ida ke tenke preocupa nafatin no processo planeamento né rasik tenke evolui, muda, matura ka tasak didi’ak no sistematicamente tenke sai di’ak liu.

Né mak to’o ona tempo di’ak atu buat hirak n’e hotu bele hala’o, no tenke acontece dunik hanesan né, ba ita ina Povo nia di’ak. Ho adequação ka acompanhamento nebé di’ak ba circunstâncias foun país nebé iha mudança no crescimento laran, mak ita sei bele hatán di’ak liu ba necessidades reais, liuhusi quadro desenvolvimento integrado ida nebé bele garante

harmonia no sustentabilidade iha níveis hotu-hotu: económico, social, cultural, político e institucional.

Né mak momento ideal atu hala'o missão ida né!

Wainhira halo preparação ba Plano Estratégico de Desenvolvimento, ida né ita beneficia ka goza hela estabilidade política e social nebé foin daudauk ita hetan. Além disso, ita bele usufrue ka aproveita reformas institucionais no estruturais nebé implementa to'o oras né no resulta período crescimento económico sem precedentes, katak uluk nunca acontece.

Plano Estratégico de Desenvolvimento usa baseia :

1º- Resultados husi **Censo 2010** nian nebé atualiza ona informações estatísticas kona-ba aspetos demográficos, económicos e sociais Nação nian – hodi hatudu mai ita retrato real no objectivo kona-ba população. PED hetan dado precisos ka loloos nian lori identifica verdadeiro progresso ho define políticas e programas necessários, no lalika kaer ba pressupostos ka buat nebé sala.

2º - Resultados husi **Consulta Pública**, hala'o iha 65 sub-distritos, no mos aldeias e sucos iha território nacional laran.

Nuné, no além de trabalho técnico todan tebetebes nian husi maluk sira nebé contribuí maka'as ba elaboração projeto ida né, inclui participação activa husi Ministérios no funcionários públicos timornian, Plano né conta ho povo tomak ninia participação.

Plano ida né rona fetos, jovens anciãos ka idosos sira nia lian; Plano né rona ita nia agricultores, profissionais saúde, empresários no professores sira nia lian; Plano né rona consumidores, doentes ka emoras, estudantes sira nia lian; Plano né rona la'ós de'it emoras sira nebé moris iha capital Díli laran maibé mos sira nebé moris iha aldeias remotas ka dook liu husi enclave Oecussi to'o ponta leste Lospalos.

#### *Filosofia Plano de Desenvolvimento Estratégico*

Ha'u fiar katak nem planeamento nem desenvolvimento mak hanesan fim. Planeamento hanesan método estruturação ideias ho ideais, ho iha nia laran iha filosofia política ida ho cariz socioeconómica no Liderança País nian hotu, tanba oobrigação, tenke assume, ka simu.

Filosofia, nebé orienta ideais hirak né, traduz ka reflete iha **oferta condições moris nebé diák liuhotu** ba população timor, iha espaço tempo nebé bele hala’o duni.

Iha condições pobreza país agora né nian, sei iha necessidades barak no boot tebetebes, nebé ninia respostas tenke mos multidimensionais e integrativas atu nuné, buat nebé precisa halo ona, além de tenke continua, liu-liu, tenke iha impacto necessário no positivo iha lares ka uma-kain hotu-hotu, iha comunidades, iha zonas, iha regiões e, iha Território tomak laran.

Principal premissa hanesan base ba plano ida né, senhoras e senhores, mak actual estado Nação né mak exige katak Liderança País né nian, tenke assume, e labele ho laran rurua, ninia responsabilidade histórica no tenke iha coragem ka aten-barani atu foti decisões ba Povo Timor-Leste nia futuro ida ke diák liu!

*Plano Estratégico de Desenvolvimento haree liu-liu ba crescimento integrado*

La iha dúvidas katak País né precisa cresce ka sa’e buras tuir termos económicos, hodi nuné sociedade né bele hetan benefícios. **Só ho crescimento económico contínuo mak bele hametin desenvolvimento componente social e humana:**

- kona-ba oportunidades emprego,
- kona-ba prestação serviços nebé di’ak liu,
- kona-ba fahe hanesan riqueza nacional,
- kona-ba aperfeiçoamento conhecimentos,
- kona-ba mudança lala’ok no hahalok no
- kona-ba confiança no estabilidade nacional.

Ita apresenta portanto pacote integrado ida kona-ba políticas estratégicas atu implementa iha tempo badak (tinan lima), continua ba médio prazo (tinan lima to’o sanulu) e ho perspectiva ba longo prazo (tinan sanulu to’o ruanulu), nebé serve hanesan guia ba desenvolvimento inclusivo, sustentável no longo prazo nian.

*Plano Estratégico de Desenvolvimento bele hala’o tanba atributos determinantes haat Nação né nian:*

Timor-Leste apesar da complexidade iha nia história no sei hanesan ‘LDC’ ida hotu, iha ninia atributos fundamentais haat mak halo be nia bele alimenta ka garante ninia promessa kona-ba desenvolvimento:

- a) **Vontade Política** – dominação colonial iha tinan atus-ba-atus laran nunca consegue harahun tomak timoroan sira nia mehi kona-ba autonomia e emancipação. Hanesan mos causa nacional ida uluk, nebé bele tau hamutuk Povo ida né hadulas ideal comum ida, nuné mos causa ida agora nian né, nebé luta ba prosperidade, ema hotu-hotu mak fomenta, ho convicção, coragem e determinação.
- b) **Potencial Económico** – graças ba rikusoin hanesan mina-rai no ninia localização geográfica iha este asiático, mak planeamento ida ke coerente e estratégico sei bele dinamiza economia, utiliza receitas husi petróleo lori investe iha sectores produtivos, investe iha infra-estruturas, iha educação no saúde, no transforma economia ida nebé agora mai tomak husi petroleo ba economia não petrolífera.
- c) **Integração Nacional** – Ho área terrestre, ka rai luan 15.000 km<sup>2</sup> e população liu uitoan milhão ida, Timor-Leste iha potencial tomak atu hala’o ho sucesso integração nacional liuhusi estabelecimento ligações efectivas entre ninia população, entre áreas rurais e urbanas no entre Governo no Povo. Ita bele ona iha tempo nebé badak , modifica ita nia “distância económica” relaciona ho fornecedores e mercados, bainhira hadi’a sistema rodoviário, telecomunicações e transportes ho fornecimento energia, no la haluha plano urbanização ida nebé permite iha equilíbrio entre áreas rurais ho urbanas.
- d) **Dinamismo** – Timor-Leste iha população ida ke sei jovem ka nurak, nebé coloca desafios balun/uitoan ba Estado, maibé lori mos perspectivas boot ba futuro. Nuné ita iha, nakloke luan, potencialidade husi população ida ke jovem nebé bele transforma tecido social e económico Timor-Leste nian, no bele, ho dinamismo, inovação no acesso ba tecnologias foun, fó ba ninia país rasik moris nebé di’ak liu.

Excelências

Senhoras e senhoras,

Estratégias no acções tomak nebé considera iha Plano ida né no ho hanoin katak to’o iha 2030, bele transforma Timor-Leste husi país ida ho baixos rendimentos sai país ida ho rendimentos médios-altos, nebé associado ka ligado metin ho população ida nebé saudável, instruída e segura ho sociedade ida ke próspera e auto-suficiente, haree husi hahán. Ida né mak ita nia Povo husu no ita hakarak hatán.

Maibé agora precisa coloca questão ida katak, ita atu halo oinsá los? Oinsá los mak PED bele fó resposta ba aspirações hirak né?

Senhoras e senhores,

Plano Estratégico de Desenvolvimento abrange áreas essenciais tolu: **capital social, infra-estruturas ho desenvolvimento económico.**

Embora metas Plano Estratégico de Desenvolvimento nian consistentes ho Objectivos de Desenvolvimento do Milénio, adapta metas hirak né hodi reflecte Timor-Leste nia história, cultura no património rasik – ita nia metas né reconhece katak atu bele hetan objectivos sociais e económicos sira seluk, precisa ba dahuluk hatán questões kona-ba construção nacional ho consolidação ba paz.

Educação ho formação né essenciais lori hadi’a oportunidades moris ita nia jovens sira nian no possibilita desenvolvimento ho crescimento económicos Timor-Leste tomak nian.

Ita nia Plano sei garante katak labarik timoroan sira hotu sei bele bá escola no hetan educação ho qualidade. Ita hakarak fó ba ita nia labarik sira hotu qualificações ho conhecimentos necessários ba sira nia futuro no ba desenvolvimento ita nia nação nian.

Sei cria sistema formação ho educação vocacional lori desenvolve ita nia cidadãos sira nia capacidades hodi nuné sira bele hasoru sasadik foun no fornece ba Timor-Leste trabalhadores qualificados nebé ita precisa.

Ita nia Plano koalía mos kona-ba ita nia hakarak atu população tenke saudável no ita nia meta atu assegura katak to’o iha 2030, ita tenke hetan serviços saúde nebé boot no ho qualidade di’ak ba cidadãos timornian hotu-hotu.

Ita nia Plano sei garante cuidados saúde primários ho qualidade ba ema hotu-hotu, liu-liu ba labarik, feto ho grupos vulneráveis, no mos desenvolvimento serviços hospitalares ho kbit atu hatán ba ita nia povo nia necessidades husi kona-ba cuidados médicos especializados.

Senhoras e senhores,

Desde independência iha tinan 2002 mak governos barak Timor-Leste refere ba assistêncian ba ema-kiak sira no vulneráveis sira hanesan prioridade nacional. Ho ema ida husi ema na'in rua mak moris iha linha pobreza okos, mak ho subsídios uitoan no sasán nebé fó ba cidadãos nebé vulneráveis liu, consegue hadi'a maka'as familias barak nia moris.

Ita precisa reconhece nafatin no fó assistêncian ba ita nia veteranos, atu bele garante katak sira ho sira nia famílias bele moris ho dignidade.

Senhoras no senhores,

Durante gerações ita nia avon no bei-ala sira depende tomak loos ba ambiente lori hetan ai-hán, hatais, materiais construção no buat hotu-hotu nebé essencial ba sira nia moris. Maibé, iha ita nia história, ita nia meio ambiente hetan estragos barak no lais tebetebes.

Plano Estratégico de Desenvolvimento baseia ba iha pressuposto ka hanoin ida katak ita nia desenvolvimento socioeconómico requiere florestas, rios ka mota ho vida marinha e animal saudáveis. Nuné ita nia Plano hakarak hafoun fali laço forte entre povo timoroan ho ninia ambiente rasik.

Ita nia Plano reconhece mos Timor-Leste nia património cultural nebé rico boot no oiain. Iha fatin hotu-hotu ita nia país laran ita iha idiomas, danças, músicas ho formas expressão social no artística oinseluk nian nebé ita la naran hetan iha fatin seluk iha mundo né.

Ita bele ona kaer metin ba ita nia tradições iha tinan rihun-ba-rihun laran no ita sente orgulho ho buat hirak nebé ita mesak mak iha, nudar ema timoroan. To'o 2020 Timor-Leste sei iha sector vibrante indústrias criativas nian nebé sei contribui maka'as ba ita nia economia no ba ita nia sentido de identidade nacional.

Senhoras e senhores,

Além do capital social, aspecto essencial ida seluk husi Plano Estratégico Desenvolvimento mak construção ho manutenção infra-estruturas essenciais e produtivas, nebé bele dada besik ita nia população no dudu ba oin ita nia indústrias emergentes.

Plano né estabelece estratégias lori hadi'a qualidade ita nia estradas nian, halo portos comerciais eficientes, hadi'a bee no saneamento no providencia ba ita nia população energia ho sistema moderno comunicações nian ida nebé ladún karun.

Estradas sei hadi'a tomak no sei harii rede rodoviária nacional lori hatutan ka hakbesik ita nia comunidades, fó acesso ba mercados no serviços governo nian no tulun desenvolvimento rural, indústrias ho turismo.

Hanesan resumo, ita nia Plano kona-ba infra-estruturas rodoviárias iha Timor-Leste atu:

- reabilita estradas rurais tomak tuir padrão mínimoto'o 2015; no
- reabilita tomak los estradas nacionais e internacionais tuir padrão internacional to'o 2020.

Elemento ida seluk nebé importante ba desenvolvimento económico e social Timor-Leste nian – no ba saúde e bem-estar ita nia povo nian – né kona-ba acesso ba bee-hemu, sistemas saneamento no esgotos nebé di'ak nian.

Ita sei continua buka nafatin atu supera ka hakat liu sasadik oioin lori hadi'a acesso ba bee-hemu, saneamento ho esgotos iha território Timor-Leste tomak, atu to'o 2030 ita nia cidadãos sira hotu bele iha acesso ba bee-hemu no saneamento nebé di'ak liu.

Senhoras no senhores,

Acesso ba electricidade n'e direito básico ho hanesan pilar ka ai-riin boot ida ba ita nia futuro económico. Ita buka hela atu halo oinsá para bele assegura katak to'o 2015 habitantes Timor-Leste nian hotu bele iha acesso ba fornecimento electricidade nebé di'ak durante tempo 24 horas loroloron.

Ida né sei halo ho investimento, nebé halo tiha ona, ba centrais eléctricas foun no lori hadi'a sistemas transmissão ho distribuição, hamutuk ho aumenta tan ona sistemas energias renováveis.

Expansão economia Timor-Leste nian ho procura ka necessidade nebé aumenta maka'as, tanba programa infra-estruturas husi Plano Estratégico Desenvolvimento nian, mak urgente cria no hasa'e capacidade portos marítimos iha costa norte no costa sul.

Plano né prevê atu halo tan portos marítimos foun iha Tibar iha costa norte no Suai iha costa sul, hodi nuné bele hatán ba exigências aban-bainrua nian husi ita nia indústria no ita nia transportes. Ita sei halo mos programa construção portos regionais iha tinan sanulu laran no desenvolve programa ida ke precisa tebetebes kona-ba reabilitação no construção aeroportos.

Hadi'a telecomunicações né mos essencial ba desenvolvimento futuro Timor-Leste nian. Visão Plano Estratégico de Desenvolvimento nian katak to'o iha 2015 ita bele iha ona rede moderna telecomunicações nebé liga cidadãos timoroan sira ho mundo seluk, nebé bele permite ita aproveita maka'as avanços husi telecomunicações globais, iha as áreas educação, saúde, governo local, informática, comunicações, segurança, justiça e formação vocacional.

Senhoras e senhores,

Três quartos husi ita nia população moris iha zonas rurais. Liu 50% husi ita nia população rural mak ho idade ki'ik liu tinan 19 .

Secção husi ita nia Plano kona-ba desenvolvimento económico haree liu ba desenvolvimento rural no estabelece políticas lori garante katak sei iha tebes duni empregos ba jovens sira né.

Atu harii ita nia nação no hasa'e-buras ita nia economia ita sei precisa concentra iha indústrias vitais tolu – agricultura, petróleo e turismo.

Ita hatene katak 70% husi famílias iha Timor-Leste depende ba actividade agrícola liu-liu atu bele tahan sira nia moris lorloron, né mak Plano né buka atu aumenta produtividade iha ita nia sector agrícola.

Aumento produtividade agrícola sei essencial mos lori atinge meta Plano Estratégico de Desenvolvimento nian kona-ba segurança alimentar to'o 2020.

Sector petróleo né indústria fundamental ida hotu iha Plano Estratégico de Desenvolvimento. Sector ida né essencial la'ós de'it ba ita nia crescimento económico maibé mos ba ita nia progresso futuro nu'udar nação nebé bem-sucedida no estável.

Enquanto ita desenvolve sector né ita precisa garante katak riqueza Timor-Leste nian haree husi recursos naturais bele utiliza hodi desenvolve ita nia nação no tulun ita nia cidadãos.

Ita sei aproveita maka'as tebes ita nia riqueza iha nível petróleo ho gás ho dalan harii Companhia Nacional de Petróleo ida, mak TIMOR GAP, desenvolve projecto Tasi Mane iha costa sul no fó ba cidadãos ho povo ferramentas ho experiênciá nebé sira precisa lori kaer rasik, administra ita nia indústria petrolífera nia desenvolvimento.

Senhoras no senhores,

Turismo mak terceira indústria nebé sei desenvolve lori tulun harii ita nia nação ho garante emprego ba ita nia jovens. Ho beleza natural no riqueza histórica e cultural Timor-Leste nian, ita iha potencial boot kona-ba desenvolvimento turismo hanesan indústria importante ida hotu, lori tonka tan ita nia desenvolvimento económico.

Indústria turismo bem-sucedida ida sei contribui ho rendimentos ba economias nacional no local, ba criação empregos no ba empresas lori hadi'a desequilíbrios económicos regionais.

Plano Estratégico de Desenvolvimento estabelece mos orientações políticas foun atu apoia desenvolvimento sector privado no harii ita nia indústria financeira iha Timor-Leste.

Ida né inclui hala'o programa reforma nian ida lori hadi'a ita nia ambiente empresarial, harii Banco Nacional de Desenvolvimento ida, lori tulun empresários sira, ho transforma Instituto Microfinanças Timor-Leste nian sai banco comercial ki'ik ida, nebé inaugura tiha ona horisehik, tuku lima loro-kraik, atu nuné bele fó tulun ba micro no pequenas empresas ho mos cooperativas, iha áreas rurais.

Senhoras e senhores,

Ita hatene husi experiênciá katak estabilidade ho segurança hanesan pré-requisitos necessários ba desenvolvimento socioeconómico. Liutiha tinan lubun ida, moris iha conflito

laran, ita nia cidadãos tomak hakarak moris iha nação ida ke estável no segura nebé reconhece estado de direito no garante acesso ba justiça ba ita nia população tomak.

Ita nia Plano hakarak hetan buat hirak né ho dalan desenvolve instituições transparentes, responsáveis no competentes iha ita nia função pública, sector segurança no sistema de justiça.

Reconhece mos necessidade atu desenvolver forças armadas profissionais nebé ema hotu respeita e ho kbiit atu defende ita nian nação no continua contribue ba paz no estabilidade iha nível regional e global.

Iha tinan ruanulu oin mai, ita sei adopta abordagem colaborativa nebé hateke dook ba oin hanesan política externa, lori buka hametin relações culturais, económicas no comerciais nebé forte liu ho países seluk no buka atu Timor-Leste sai membro contributivo comunidade internacional nian.

Senhoras no senhores,

Estratégias ho linhas acção nebé apresenta ona, hakarak liu-liu mak hakmán agricultura ho sector público, enquanto dudu ba oin ita nia economia, lori aposta liu-liu iha sector privado nebé sa'e daudan ona, iha indústrias no serviços sira seluk .

Atu ita bele arranca ho paradigma foun né, essencial mak investimento público nebé forte no dinamismo maka'as husi parte sector privado. Ita laran haksolok tanba hatene katak maski ho grave crise económica internacional, economias emergentes barak mak sai forte liután.

Timor-Leste bele hanesan economias hirak nebé temi bá, liu-liu aproveita vantagem katak de facto nia halo parte região asiática. Ita nia adesão ba ASEAN fó potencial mercado boot tebes mai ita no relações di'ak nebé ita iha ho países hanesan China, Japão no Indonésia, halo be ita nia ambição né ho esperança boot liután.

Husi parte seluk, ita conta ho ita nia principal campo petróleo mak Bayu Undan ho campo Kitan, nebé la kleur sei começa fó receitas ba país, estima katak bele produz cerca de 22 mil milhões de dólares to'o 2025. Campo Greater Sunrise ho potenciais seluk nebé sei hetan tan sei aumenta maka'as ita nia receitas, iha tinan sanulu-resin oin mai.

Nuné, ita ható'o ona ba Parlamento Nacional ita nia proposta revisão ba Lei do Fundo do Petróleo. Ita sei diversifica investimento husi Fundo Petrolífero, lori aumenta equilíbrio iha “bonds” no “equities”, atu bele produz, ho segurança, osan barak tan ba ita nia país.

Ita mos explora mecanismos foun atu financia programas infra-estruturas nian inclui iha PED, hanesan caso Parcerias Público Privadas no empréstimos concessionais. Buat hirak né sei fó vantagem tanba permite habelar sector privado iha Timor-Leste tomak laran, liu-liu iha projectos nebé boot, hanesan caso kona-ba estradas, pontes, portos no aeroportos.

Timor-Leste sorte liután tanba iha parceiros desenvolvimento barak no laran mesak luan nebé sei continua fó apoio no assistência financeira ba sectores no linhas ministeriais hotu-hotu. Assistência né crucial tebes, liu-liu kona-ba desenvolvimento ita nia recursos humanos, tanba se lae ita sei la bele implementa estratégia desenvolvimento ida né ba Nação.

Senhoras no senhores,

Antes de hakotu, ha'u tenke temi mos ita nia Agência Desenvolvimento Nacional, nebé foin harii, nebé sei sai hanesan Agência Planeamento Económico no Investimento, principal responsável ba implementação ita nia Plano né nian.

Agência Planeamento Económico no Investimento sei halo plano, desenho no monitoriza programas ho projectos estratégicos, supervisiona ministérios de tutela ba projectos, assegura coordenação nebé integrada iha Governo tomak, garante implementação Plano Estratégico ida né, assegura boa governação ho execução tuir tempo no ho qualidade.

Atu complementa, projecta mos criação Comissão Nacional de Aprovisionamento, nebé sei contrata fali Firma internacional ida nebé competente, atu hala'o processo ida nebé competitivo kona-ba aprovisionamento, lori garante qualidade ho eficiência custos.

Claro, ita sei continua mos usa planos sectoriais nebé prepara husi Ministros no Departamentos lori ajuda implementação, enquanto que processo orçamento anual sei continua iha papel fundamental.

Senhoras no senhores,

Ita hatene katak ida né plano ambicioso ida no desafios nebé sei mosu iha ninia implementação boot tebetebes maibé, hanesan líderes Nação né nian nebé hatene di'ak necessidades no anseios Povo nian, ita precisa hano in katak plano ida né viável, oportuno no to'o duni ona tempo atu apresenta.

Ita hetan isnpiração husi *Monterrey Consensus on Financing for Development* nebé declara katak *“parcerias efectivas entre doadores no recipientes baseia ba reconhecimento liderança ho apropriação nacionais husi planos desenvolvimento”*. E buat hirak né hotu hateten hikas fali iha Cimeira G8, iha Gleneagles, iha 2005: *“Depende ba países iha desenvolvimento no ba sira nia governos atu kaer liderança iha desenvolvimento. Sira precisa decide, halo plano, tuir fases soira nia políticas económicas lori ajusta ho sira nia estratégias políticas rasik, nebé sira tenke responsabiliza ba sira nia povo rasik”*. Ida né mak futuru nebé ita atu decide ba ita nia an rasik.

Loos duni, tanba Povo MERECE! No Povo hein hela deit ita atu halo buat ruma! Nia luta iha tinan 24 laran ba ida né duni, tanba nia fira katak independência sei lori buat nebé di'ak liu ba nia né mak nia hein hela deit, iha tinan sanulu (10) laran, atu buat ruma bele acontece, hodi nia mos sente katak selu duni nia susar no térus uluk nian!

Ha'u fiar katak Parceiros de Desenvolvimento Timor-Leste nian sira sei tulun nafatin ita nia decisões kona-ba desenvolvimento no, dala ida tan, sira sei alinha sira nia prioridades ho Povo Timor ninia prioridades.

Hanesan buat nebé Sua Excelência Presidente da República hateten rasik ona iha Prefácio documento ida nebé ohin ami fahe:: «preparação Plano Estratégico Desenvolvimento nian né, ita nia Povo mak hala'o, pertence ba Povo no hatudu ita nia Povo nia aspirações rasik».

Tanba razaun ida né mak, ita hotu, timoroan, fiar metin katak né mak funu ida tan nebé ita tenke manán, tanba atu oinsá mos, sucesso iha implementação Plano né nian sei depende tomak ba povo timor nia hakarak.

Obirgado barak.

Kay Rala Xanana Gusmão

12 de Julho de 2011